

林文忠公政書

函廣奏稿

乙集卷一、二、三、四

柳田文庫  
文庫11  
D 327  
7



文庫11  
D327  
7

柳田泉文庫

48-12438

010190567406



燒燬匪船以斷接濟摺

奏為暎夷被逐出口之後仍在外洋寄旋逗留現  
將攏近夷船各匪船痛加燒燬拏獲接濟漢奸  
嚴審懲辦使奸夷無所希冀以免觀望售私恭

摺奏祈

聖鑒事竊臣等前奉

諭旨斷絕暎暗喇貿易將該國船隻盡行驅逐出口  
當經欽遵辦理并列其罪狀宣布各夷復嚴禁  
他國夷商不許私代暎夷帶運貨物即他國貨

林文忠公收書  
一集 兩廣奏稿

林文忠公政書 卷一  
船出入盤查搜驗亦皆加倍從嚴業經節次

奏蒙

聖鑒在案查暎夷貨船自驅出外洋之後節據引水人等查報陸續起旋揚帆駛出老萬山外夷洋者約有十餘隻而觀望留連不肯捨去者尚復不少並有新從彼國來粵已過老萬山始知封港因不准進口祇在外洋徘徊寄泊者臣等既將該夷乞恩之稟嚴行批駁堅與之絕復令齎給批稟之通事引水等嚴切傳諭以此次封港

係欽奉

大皇帝特頒

諭旨因該夷抗違法度不許在粵通商斷難希圖影射若不作速回帆設遇風火不測皆爾等自作之孽雖悔何追惟該夷貪狡性成帶私者固思乘間覓售卽載貨者亦豈甘心棄地而義律虛僑素著未曾受此折磨今斷其貿易布其罪狀伊旣全無顏面勢必別蓄詭謀於是海上傳聞謠言不一有謂暎夷會集各埠兵船同來滋擾

林文忠公政書

卷一

兩廣奏稿

二

者有謂來船一二隻滿載礮火將逗留之貨船  
盡扮兵船者有謂該夷去秋求准通商已將新  
烟載回夷埠今貿易既斷轉無顧忌奸夷載去  
別貨仍將鴉片換來設計誘人玩法者臣等竊  
思前兩說本係恫喝固不足信而自去年責令  
繳烟以後各處海口早已戒備不虞況此時既  
絕其通商豈可不防其叵測無論該夷有無兵  
船續至即現在之吐密嘩喻兩船未去度其頑  
抗之意妄誇礮利船堅各夷船恃為護符謂可

阻我師之驅逐臣等若令師船整隊而出遠赴  
外洋併力嚴驅非不足以操勝算第洪濤巨浪  
風信靡常即使將夷船盡數擊沈亦只尋常之  
事而師船既經遠涉不能頃刻收回設有一二  
疎虞轉為不值仍不如以守為戰以逸待勞之  
百無一失也惟後一說以為貿易既斷轉無顧  
忌傳聞貨去烟來如果蓄此奸謀倍當防其流  
毒蓋粵洋漁船蛋艇之多幾不可以數計其人  
貪利亡命無不遠赴外洋而奸夷加意招徠陷

以倍蓰之利卽一蔬一薪亦皆厚給其值並以鴉片與之兌換使之兩獲其利利愈重則命愈輕故夷船寄棹雖遙而冒險犯法以趨之者聞已漸相環集此又斷其貿易之後更出一種私弊不可不亟亟剷除者臣等再四思維惟有以奸治奸以毒攻毒卽與提臣關天培密商取平時所裝大小火船卽雇漁蛋各戶教以如何駕駛如何點放每船領以一二兵弁餘皆雇用此等民人以爲水勇先赴各洋澳分投埋伏候至

夜深各船俱已熟睡察看風潮皆順卽令一齊放出乘勢火攻將此等環附夷船各匪船隨燒隨拏許以燒得一船卽給一船之賞如能延燒夷船倍加重賞此臣籌畫之辦法也茲接關天培函稱正月二十七日丑刻原任遊擊馬辰帶水勇四十名由東涌上下濠前進加都司銜之守備盧大鉞帶水勇頭目盧麟等由屯門前進以都司用之守備黃琮由后海青山前進把總楊雄超帶水勇四十名與千總王應鳳外委朱

鎮邦余興邦黃文祥區鎮江各由長沙灣前進  
將近夷船寄旋之處出其不意一齊發火復將  
噴筒火礮乘風拋擲燒去屠牛換土之大海船  
一隻買運烟土之艚船一隻大買辦艇一隻大  
扒艇一隻蝦筍辦艇三隻雜貨料仔艇一隻賣  
果子鮎餅之扁艇十五隻又將夷船高頭三板  
前後延燒該夷駕駛逃開撲救漸熄未經沈沒  
又燒燬海中沙灘所搭篷寮六處所有通夷各  
奸民除在船燒斃及島水脫逃淹斃不計其數

外生擒身穿夷袴腳穿夷鞵之匪犯黃添福及  
接濟匪犯陳水生喬亞先林亞長鍾亞受劉亞  
五袁亞二巫亞二梁得勝林亞得其十名派委  
備弁管解來省審辦等情臣等查此次燒燬運  
土及濟夷匪船大小共二十三隻篷寮六處除  
燒斃淹斃各犯外生擒十名不惟足懾漢奸之  
心亦可以寒暎夷之膽現將解到各犯嚴審重  
辦以示儆戒出力之弁兵水勇由臣等分別超  
拔獎賞以昭激勸並飭時加查探如夷船尙未

遠颺匪船旋又趨附仍當相度潮信風勢再予  
 會合焚燒緣奸民貪利忘生懲創不得不重而  
 奸夷誘人玩法拒絕亦不得不嚴至別國出入  
 夷船均遵禁令出具不敢夾帶鴉片並添具不  
 敢暗代暎夷運貨切結臣等仍多派妥幹員弁  
 於各口加倍嚴查總期杜弊清源以仰副  
 聖王訓諭諳諳之至意所有現辦情形臣等會同水  
 師提督臣關天培粵海關監督臣豫堃合詞恭  
 摺具

奏伏乞

皇上聖鑒訓示謹

奏

密陳駕馭澳夷情形片 附夷信

再澳門寄居西洋夷人歷三百年之久貨物自  
 來行收稅蓋屋轉賃他夷映咭喇人早已垂涎其  
 地自嘉慶十三年間映夷突占澳門礮臺旋經  
 天朝官兵驅逐從此西夷始有戒心而澳中夷眾良  
 莠不齊難保不被映夷勾通煽誘必使該夷官  
 明於大義上感

天朝恩澤下顧夷眾身家始可固藩籬而資捍衛上  
 年映夷義律於繳清鴉片以後即有在澳門裝



貨之請經<sub>臣</sub>林則徐嚴切批駁不許開端伊之  
詭計不行因而多方違抗七月間將澳內五十  
七家喚眾全行驅逐出澳散住各船而該夷每  
以三板駛近澳門潛行窺探是其處心積慮未  
嘗一日忘也嗣經不准通商尤恐其鋌而走險  
故於澳門水陸加倍嚴防既經前督<sub>臣</sub>鄧廷楨  
奏請將新升南澳鎮總兵惠昌燿留香山協之任  
復與<sub>臣</sub>等  
奏請將高廉道易中孚駐澳彈壓均蒙

聖慈俞允其水陸官兵陸續調派分布澳內澳外要  
隘者各數百名計已足資策應惟澳地三面皆  
臨外海喚夷貨船自經逐出之後仍恃有吐噍  
嘩論兩兵船爲之護符不免乘閒遊奕本年正  
月初間義律與夷人數名乘坐該夷兵船至九  
洲停泊義律等潛放三板私行入澳<sub>臣</sub>等接稟  
卽飭嚴拏旋據該道易中孚等以西洋夷目稟  
稱澳內華夷雜處若兵役圍拏恐致擾動懇請  
稍緩自必驅逐等語<sub>臣</sub>等諭令限以日期驅逐

淨盡若過期尚有暎夷在澳則西洋貿易亦卽  
暫停蓋馭夷不外操縱二端而操縱只在貿易  
一事夷性靡常不得以此爲把握自責令西  
夷驅逐暎夷之後義律已卽出澳而尚有暎夷  
啞喱啞哩二名逾期未去臣等當將西夷貿易  
示諭暫停一俟暎夷全逐出澳仍卽照常通市  
緣西洋夷人在澳內者有

天朝聲威可恃而其出洋之船一至夷界則畏暎夷  
之強顧後瞻前勢所難免臣等責其容留暎夷

停其澳中貿易則西夷有詞可謝而暎夷遂無  
地可容迨其逐去而貿易復開仍無損西夷生  
計但係駕馭權宜之術不敢明宣惟有據實密

陳仰乞

聖明垂鑒至現准軍機大臣字寄欽奉

諭旨據曾望顏奏稱請封關禁海又另片奏澳夷互  
市定以限制著悉心妥議具奏等因欽此容臣等  
與水陸兩提臣暨粵海關監督備細熟商總期  
計出萬全始敢籌覈定議另行會摺覆

奏再現值防夷喫緊之際必須時常探訪夷情知其虛實始可以定控制之方茲<sub>臣</sub>等訪獲暎夷與西洋往來書信六封密令諳曉夷字之人譯出漢文另錄清摺恭呈

御覽謹

奏

謹將訪獲暎夷義律吐嚙與澳門西洋兵頭近日往來密信六封譯出漢文鈔錄清摺恭呈

御覽

暎咭喇領事義律寄澳門西洋兵頭信  
義律寄信與西洋兵頭敦阿特厘阿加西阿打  
西爾威拉賓多現在暎咭喇在中國貿易首領  
事爲

欽差及省中官府強霸之事我今以暎咭喇國家之名懇請求准將暎人存下貨物運至澳門囤貯棧房依澳門章程納稅今我所求之事並非立意欲破中國人所定之章程將暎國貨物在澳門出賣與中國人不過立意欲將暎國之貨物

放於平安之地步使各空船可以開身我今不  
必多言惟望爾貴人施仁厚之德與啖咭喇之  
人我甚感激不淺至我時常思想欲將澳門變  
爲長久大利益之處我等思想之事時候已至  
欲將貨物交澳門代理發賣其權係在爾貴人  
手上以我想來此事亦並未破中國人所立之  
章程今我求爾貴人熟思此事

一千八百四十年正月初一日在澳門洋面窩  
拉疑兵船上首領事義律印此

外夷本年正月初一日乃是內

地上年十一月二十七日理合聲明

西洋兵頭回信

西洋兵頭回覆管理啖咭喇在中國貿易首領  
事貴人義律之前明鑒澳門兵頭等接得正月  
初一付來之信欲將啖咭喇船上之貨物搬到  
澳門不過欲將各貨放於平安地步使各空船  
可以回國觀此信中之事我見得自己不能有  
如此大權回答此件大緊要之事兼以須依管  
理澳門地方之法律我亦無如此大權可能定

奪此事故我卽將首領事之信知會此處之西  
澤底大家商議我等心中雖欲應承惟因中國  
官府禁止我等不准與首領事有來往我等雖  
欲將就首領事惟因例禁不能如我等所願故  
不得已推辭首領事所請現在我等并不爲所  
失不能在澳做中國與外國貿易之利益而憂  
愁乃爲不能遵首領事請帶貨物到澳囤積之  
事而憂愁現在我亦不必多寫書信解明因何  
不依首領事所請帶貨到澳門囤貯之事蓋首

領事曾在澳門居住數年諒已知道在澳西洋  
人與中國官府之交情尙望忠厚之啖咭喇國  
王保護澳門以免我等受從來所未受過之艱  
難危險今我等已定奪不能如首領事所請故  
特寫此回信與首領事求首領事明鑒體察  
一千八百四十年正月十六日在澳門敦阿特  
厘阿加西阿爾威拉賓多印此外夷本年正月  
十六日乃是內  
地上年十二月十  
二日理合聲明  
啖咭喇夷官吐密致西洋兵頭信

窩拉疑兵船船主吐密寄信與西洋兵頭敦阿特厘阿加西阿打西爾威拉賓多我現在實不隱瞞爾貴人因為中國官府出如此要重之告示黏在澳門牆上其中言語喚咭喇住澳之人讀之盡皆驚惶爾貴人亦知道保護喚咭喇人之性命乃係我之專責目下之事乃關於我之重任欲遣一隻兵船進至澳門港口不獨為保護在澳居住之喚咭喇人亦可以守著澳門以為有事時退步之計而兵船進澳門並無打仗

之意我正願爾貴人不必理我等與中國之事如此我亦十分恭敬爾貴人

一千八百四十年二月初四日在澳門洋面窩拉疑兵船上吐密印此

外夷二月初四日乃是內地正月初二日理合

聲明西洋兵頭回信

接爾貴人來信云要遣兵船一隻進澳門港口之事似是與我等國中對敵蓋兵船進口乃歷來禁止之事即爾貴人之國家亦未必令爾攻

敵我等之道理當水師官特魯里時亦併未有帶兵船進澳門港口之事今爾貴人之非我特講明如果欲遣兵船到澳門港口乃是不公義之事現在爾貴人所行之事與爾貴人去年所見甚是不同爾貴人若如此言行相違我必將爾貴人之事聲明與暎國及我等國家知道矣伏望上天保護於爾貴人  
一千八百四十年二月初四日在澳門敦阿特厘阿加西阿打西爾威拉賓多印此

吐嚙又寄西洋兵頭信

我今對爾說知爾於本日付來之信我已經收到今復有信與爾貴人現在暎咭喇人要在西洋旗下居住爾肯保護否抑或爾竟任暎咭喇各人如前六箇月被人苦磨不肯保護耶如果實是不能保護暎咭喇人須要暎咭喇人離去澳門爾貴人據實說明我亦立將兵船撤去離此處澳門港口并即將爾所說之話知會我本國之人

一千八百四十年二月初四日在窩拉疑兵船上吐嚙印此

西洋兵頭回信

本日內附來問我之信緣我乃係我等國王命來代理此處事情之人我今明回答與爾此處地方與我等國王所管之別處地方不同管別處地方可以給別國人居住若此處給別國人居住此處地方之居民卽不得安靜又受驚嚇之事斷斷不能難道現在啖咕喇人到船居住

豈卽有各樣擾害乎豈必須到此處居住以爲保護乎前時啖咕喇人在澳門居住我亦曾一體保護此乃實在事情人所共知管理在中國之啖咕喇貿易首領事曾讚揚於我卽爾自己亦曾稱揚於我惟現在此處之事情已比從前不同中國一封禁伙食所有各樣貿易事務皆已敗壞矣爾亦知道我等國家與中國相交之章程律例除卻破壞船隻到來修理之外從未有何等船隻進至澳門港口我今以我等國家



之名請爾出令吩咐海阿新兵船離去此處港口俾我可盡心保護我國家之人民在此地方得以平安暎咭喇人不要想我留他們在此處居住我亦必守與中國人所定之章程定不肯違背之只是中國與暎國兩邊之事我皆不理如在爾之第一封信內所說一樣在爾不過係爲爾自己所受之重任故行如此冒失之事以違犯我等之法律在此等行爲豈得謂之好道理此封信乃我在議事亭與西拏底等會議時

所寫在爾只是指出暎咭喇人不在澳門居住之難處並不思及西洋五千入爲暎咭喇人朋友之情亦受重累自首領事回到此處之後所有之貿易皆要停止所有之稅餉爲西洋兵丁之費以爲保暎咭喇人平日之平安爾亦當思念及之爾若不念我對爾說之事我即將近來九箇月內所有之事宜布與通天下知道求各國依公義判斷我又對爾說知爾所行之事不獨犯我國法律乃亦有犯於暎咭喇國家之法

律伏望上天保佑于爾

一千八百四十年二月初四日在議事亭內敦

阿特厘阿加西阿打西爾威拉賓多印此

覆奏曾望顏條陳封關禁海事宜摺

奏為遵

旨悉心籌議恭摺覆

奏仰祈

聖鑒事竊臣等承准軍機大臣字寄道光十九年十

二月十一日奉

上諭本日據曾望顏奏夷情反覆請封關禁海設法

勦辦以清弊源一摺又另片奏澳夷互市貨物亦

請定以限制等語著林則徐怡良關天培郭

并傳諭豫堃知之欽此臣林則徐臣怡良謹將鈔  
發原摺細加閱看並傳知臣豫堃一體領閱因  
關各國夷人事務祇宜慎密商辦未便遽事宣  
揚復經函約臣關天培臣郭臣於查閱營伍  
之便過省面商茲已詢謀僉同謹將察看籌議  
情形爲我

皇上敬陳之查原奏以制夷要策首在封關無論何  
國夷船概不准其互市而禁絕茶葉大黃有以  
制伏其命封關之後海禁宜嚴應飭舟師將海

盜剿捕盡絕又禁大小民船概不准其出海復  
募善泅之人使駕火船乘風縱放而以舟師繼  
之能擒夷船卽將貨物全數給賞該夷未有不  
畏懼求我者察其果能誠心悔罪再行奏懇

天恩准其互市仍將大黃茶葉母許逾額多運以爲  
箱制之法所論甚切所籌亦甚周臣等查粵東  
二百年來准令諸夷互市原係

推恩外服普示懷柔並非內地賴其食用之資更非  
關權利其抽分之稅况自上冬斷絕暎夷貿易

以來屢奉

諭旨區區稅銀何足計論大哉

謨訓中外同欽臣等有所秉承更可遵循辦理絕無所用其瞻顧即將各外國在粵貿易一律停止亦並不難惟是細察情形有尙須從長計議者竊以封關禁海之策一以絕諸夷之生計一以杜鴉片之來源雖若確有把握然專斷一國貿易與概斷各國貿易揆理度勢迥不相同蓋鴉片出產之地皆在暎咭喇國所轄地方從前例

禁寬時原不止暎夷販烟來粵卽別國夷船亦多以此爲利而自上年繳清躉船烟土以後業經奏奉

恩旨概免治罪卽未便追究前非此後別國貨船莫不遵具切結層層查驗並無夾帶鴉片乃准進口開艙惟暎咭喇貨船聚泊尖沙嘴不遵法度是以將其驅逐不准通商今若忽立新章將現未犯法之各國夷船與暎咭喇一同拒絕是抗違者擯之恭順者亦擯之未免不分良莠事出

無名設諸夷稟問何辜臣等卽礙難批示且查  
暎咭喇在外國最稱強悍諸夷中惟咪喇啞及  
佛蘭西尚足與之抗衡然亦忌且憚之其他若  
荷蘭大小呂宋暹國喘國單鷹雙鷹堪啞啞等  
國到粵貿易者多仰暎夷鼻息自暎夷貿易斷  
後他國頗皆欣欣向榮蓋逐利者喜彼細而此  
羸懷忿者謂此榮而彼辱此中控馭之法似可  
以夷治夷使其相閒相睽以彼此之離心各輸  
忱而內向若概與之絕則缺望之後轉易聯成

一氣句結圖私左傳有云彼則懼而協以謀我  
故難閒也我

天朝之馭諸夷固非其比要亦罰不及衆仍宜示以  
大公且封關云者爲斷鴉片也若鴉片果因封  
關而斷亦何憚而不爲惟是大海茫茫四通八  
達鴉片斷與不斷轉不在乎關之封與不封卽  
如上冬以來已不准暎夷貿易而臣等今春查  
訪外洋信息知其將貨物載回夷埠轉將烟土  
換至粵洋並聞奸夷口出狂言謂關以內法度

雖嚴關以外汪洋無際通商則受管束而不能  
違禁不通商則不受管束而正好賣烟此種貪  
狡之心實堪令人髮指是以<sub>臣</sub>等近日更不得  
不於各海口倍加嚴拏有一日而船烟並獲數  
起者可見暎夷貨去烟來之言轉非虛捏不然  
以外洋風浪之惡而暎夷仍不肯盡行開去果  
何所圖若如原奏所云大小民船概不准其出  
海則又不能緣廣東民人以海面爲生者尤倍  
於陸地故有漁七耕三之說又有三山六海之

謠若一概不准其出洋其勢卽不可以終日至  
捕魚者只許在附近海內此說雖亦近情然旣  
許出洋則風信靡常遠近幾難自定又孰能於  
洋面而阻之卽使責令水師查禁而晝伏則夜  
動東拏則西逃亦莫可如何之事<sub>臣</sub>林則徐上  
年刊立章程責令口岸澳甲編列船號責以五  
船互保又令於風帆兩面及船身兩旁悉用大  
字書寫姓名以及里居牌保惟船數至於無算  
至今尙未編完繼又通行沿海縣營如有夷船

竄至該轄無論內洋外洋均將附近各船暫禁  
出口必俟夷船遠遁始許口內開船其平時出  
入漁舟逐一驗查只許帶一日之糧不得多攜  
食物若銀兩洋錢尤不許隨帶出口庶可少除  
接濟購買之弊至大黃茶葉二物固屬外夷要  
需惟臣等歷查向來大黃出口多者不過一千  
擔緣每人所用無幾隨身皆可收存且尙非必  
不可無之物不值爲之厲禁惟茶葉歷年所銷  
自三十餘萬擔至五十餘萬擔不等現在議立

公所酌中定制不許各夷逾額多運卽爲箱制  
之方然第一要義尤在沿海各口查拏偷漏若  
中路封關操之過蹙而東西各路得以偷販出  
洋則正稅徒虧而漏卮依然莫塞是以制馭之  
道惟貴平允不偏始不至轉生他弊若謂他國  
買回之後難保不轉賣暎夷此卽內地行鋪互  
售尚難家至日見而況其在域外乎要知暎夷  
平日廣收厚積本有長袖善舞之名其分賣他  
夷以牟餘利乃該夷之慣技今斷絕貿易之後

即使從他夷轉售一二亦已忍垢蒙恥多喫暗  
虧譬如大賈殷商一旦僅開子店寄人籬下已  
覺難堪惟操縱有方備防無懈則原奏所謂該  
夷當畏懼而求我者將於是乎在矣至於備火  
船練鄉勇募善泅之人等事則臣等自上年至  
今皆經籌商辦理惟待相機而動即各山淡水  
上年本已派弁守之始則夷船以布帆兜接雨  
水幾於不能救渴繼而覓諸山麓隨處汲取不  
窮則已守不勝守似毋庸議總之馭夷宜剛柔

互用不必視之太重亦未便視之太輕與其涇  
渭不分轉致無所忌憚曷若薰蕕有別俾皆就  
我範圍而且用諸國以併拒諸夷則有如踣鹿  
若因嘆夷而並絕諸國則不啻驅魚此際機宜  
不敢不慎况所杜絕者惟在鴉片即原奏亦云  
凡有夾帶鴉片夷船無論何國不准通商則不  
帶鴉片者仍皆准予通商亦已明甚彼各國夷  
人原難保其始終不帶若果查出夾帶應即治  
以新例不但絕其經商如其無之自不在峻拒



之列也又另片請將澳門西洋貿易定以限制  
查上年臣林則徐先已會同前督臣鄧廷楨暨  
臣豫堃節次商議及之嗣經核定章程諭令澳  
門同知轉飭西洋夷目遵照卽如茶葉一項每  
歲連箱准給五十萬斤仍以三年通融併計以  
示酌中之道其他分條列款該夷均已遵行本  
年正月澳內容留暎夷卽暫停西洋貿易迨其  
將暎夷驅出仍卽准合開關亦與原奏請議章  
程不謀而合至所請責令澳夷代暎夷保結一

節現既不淮暎夷貿易自可毋庸置議臣等彼  
此商酌意見相同謹合詞恭摺覆

奏伏乞

皇上聖鑒訓示再此摺係臣林則徐主稿內有密陳  
夷情之處謹請毋庸發鈔合併聲明謹

奏

尖沙嘴官涌添建礮臺摺

奏為籌議添建礮臺兩座以資控制而重海防恭摺

奏祈

聖鑒事竊照廣東水師大鵬營所轄洋面延袤四百餘里為夷船經由寄泊之區其尖沙嘴一帶東北背負岡陵西則有急水門雞踏門東則有鯉魚門佛堂門而大嶼巨島又即在其西南四面環山藏風聚氣波恬浪靜水勢寬深暎夷船隻

久欲倚爲巢穴而就粵省海道而論則凡東赴  
惠潮北往閩浙之船均不能不由該處經過萬  
一中途梗阻則爲患匪輕上年因暎咭喇桀驁  
不馴抗違禁合經臣等與前督臣鄧廷楨調集  
官兵在尖沙嘴迤北之官涌等處山梁扎營安  
礮分爲五路痛加勦擊該夷兵船二隻貨船數  
十隻始皆連夜遁去但恐兵撤之後仍復聯檣  
聚泊勢若負嵎必須扼要設防方足以資控制  
隨飭候補知府余保純署大鵬營參將賴恩爵

新安縣知縣梁星源會同周厯履勘旋據該員  
等稟稱尖沙嘴山麓有石腳一段其形方長直  
對夷船向來聚泊之所又官涌偏南一山前有  
石排一段天生磐固正對夷船南洋來路若兩  
處各建礮臺一座聲勢既相聯絡而控制亦極  
得宜等語當經飭令籌兩臺高寬丈尺及開築  
地平並建造牆垛礮洞弁署兵房神廟望樓藥  
局馬路一切工料價值覈實確估據該員等呈  
送圖說清摺臣等逐一核算並委員詳細稽查

凡有可以樽節之處復經酌量核減計尖沙嘴  
礮臺估需工料銀一萬七千九百五十一兩零  
官涌礮臺估需工料銀一萬四千四十六兩零  
實係省之又省必不能少竊思此項工程係屬  
防夷要務斷不可緩第

國家經費有常仍不敢請動

帑項臣等當與藩臬運司公同籌畫查有前山營  
生息一項係由洋商捐銀發交當商生息前於  
嘉慶十四年奏明作為添設前山營兵餉之用

按年覈實支銷已歷三十餘年之久因而存有  
積併盈餘截至道光十九年五月底報部冊開  
實存銀五萬三千八百餘兩除大鵬營現議更  
改營制所需添造快船建立衙署及製備新兵  
器械另招請在此款動支外核其成數尙足以  
敷動撥前項礮臺工料之需合無仰懇

聖恩俯念礮臺工費爲防夷所需而捐款息銀與庫  
項有閒

准於商捐前山營生息一項銀兩動支兩座礮臺經

費並請循照舊章將動用銀兩總數於冊內開  
除造報免造工料細冊報銷感荷

鴻慈倍無既極至此項工程因夷務喫緊之際先已  
購料興工趕緊建築務於夏令南風盛發以前  
一律全完以資防制計兩臺應安大礮五十餘  
門亦已於腹地各營酌其緩急情形先行運撥  
濟用一面籌資購補期於普律森嚴以仰副

聖王綏靖海疆之至意所有籌議添建礮臺緣由據  
藩臬運司會詳前來臣等謹會同廣東水師提

督臣關天培合詞恭摺具

奏伏乞

皇上聖鑒訓示謹

奏

奏光宗

請改大鵬營營制摺

奏為察看廣東水師情形大鵬營現居緊要籌議  
改設副將並添撥移改官兵船隻等項以資守  
禦而重海防恭摺

奏祈

聖鑒事竊照廣東虎門海口為中路扼要之區於嘉  
慶十五年設立水師提督駐劄其地西則香山  
東則大鵬形成兩翼查香山協向駐副將管轄  
兩營額設弁兵一千七百零九員名兵力較厚

大鵬原止一營額設參將一員管轄洋面四百餘里其中有孤懸之大嶼山廣袤一百六十餘里是以道光十年已將大鵬分爲兩營而所設弁兵只九百九十八員名較之香山營制已有軒輊且所轄尖沙嘴洋面近年更爲夷船聚泊之區該處山高水深風浪恬靜夷船倚爲負隅之固上年調集官兵痛加勦擊始行全數退出恐兵撤之後仍復聯檣而來佔爲巢穴當又相度形勢在於尖沙嘴及官涌兩處添建礮臺二

座現在工程將竣已於另摺縷析

奏報在案臣等復查尖沙嘴官涌兩處既經建設礮臺必須調兵防守但大鵬左營額設參將一員守備一員千總二員把總三員外委五員額外外委二員步守兵四百九十七名右營額設守備一員千總一員把總三員外委五員額外外委二員步守兵四百七十五名除分班出洋外尙不足以敷巡守據該營縣會議請添經臣等與水師提督臣關天培再四籌商應將大鵬

改營爲協撥駐副將大員統帶督率與香山協聲勢相埒控制方爲得力但官兵俸餉歲需支應

國家經費有常未敢遽議增添惟有就通省各營設法抽撥并於水師各缺酌量改抵以歸簡易飭據司道核議會詳併咨准陸路提督臣郭

核覆前來臣等查外海水師副將共有四缺內除香山協應與大鵬分張兩翼毋庸更議外其龍門一協地處邊陲與越南夷地緊連崖州

一協係烟瘴之區且外臨大海內控黎人均爲邊疆要地未便改抵惟澄海一協雖與閩省接壤而上接南澳下連潮州有水陸兩鎮爲鄰尙屬易資聲援應將澄海協副將改爲大鵬協副將移駐大鵬所轄扼要之九龍山地方居中調度其澄海協之都司改爲大鵬協副將中軍都司兼管左營事務駐劄大鵬所城並於大鵬左營添設把總二員外委二員額外二員步戰守兵連新添外委額外名糧共二百九十一名大



九龍砲臺千總一員把總一員外委二員額  
外二員步戰守兵連新添外委額外名糧共二  
百零九名以把總一員兵七十五名專防右營  
官涌砲臺以把總一員駐防九龍砲臺將原駐  
九龍砲臺之千總一員移防左營尖沙嘴砲臺  
併帶新設額外外委一員兵丁一百三十名又  
以外委一員兵丁十五名防守前經裁撤今應  
設回與尖沙嘴對峙之左營紅香爐汛又大鵬  
額設大小米艇六隻撈繪船三隻分撥配巡不

敷派遣應添大中米艇四隻左右營各半以千  
總一員把總一員外委二員兵丁二百零四名  
配駕又添快船二隻以額外二員兵丁五十六  
名配駕其餘外委一員額外一員兵丁十二名  
隨防九龍聽候副將差遣所添員弁船隻先儘  
水師各營移撥應請在陽江鎮右營抽撥千總  
一員海門營抽撥把總一員外委一員龍門協  
左營抽撥外委一員龍門協右營抽撥外委一  
員陽江鎮右營抽撥大米艇一隻海安營抽撥

林文忠公政書 卷二  
大米艇一隻龍門協左營抽撥中米艇一隻海  
門營抽撥中米艇一隻又在龍門協右營抽撥  
撈繪船一隻歸入海安營配緝所需配船弁兵  
舵工口糧隨船移撥支給至議抽兵丁五百名  
水陸勻撥水師應抽兵丁二百五十名現在外  
海內河防堵巡緝在在需人若概於額設步守  
兵內抽撥未免顧此失彼應在水師提鎮協營  
酌量抽撥步兵三十七名守兵九十四名酌裁  
馬兵改補步兵一十名連撥外委本身步糧三

名共得步兵五十名守兵九十四名尚需添補  
步兵二十五名守兵八十一名在水師各營馬  
糧較多營分將馬糧三十三名改爲守兵步糧  
較多營分將步糧一百六十四名改爲守兵均  
各歸還原營兵額同馬兵所改步兵一十名遞  
年節存馬步糧料等項銀兩撥補增添步守兵  
丁一百零六名歲需經費之用此外仍需把總  
二員外委一員步兵連外委本身名糧七十五  
名守兵一百七十五名應於督標五營及永靖

營酌抽把總二員陸路提標五營酌抽外委一員其原食馬糧一分勿庸隨撥併於陸路各營勻撥步兵七十五名守兵一百七十五名其兵二百五十名均歸大鵬入額其外委仍食本身步糧並在大鵬步兵數內添設額外外委四員仍支本身名糧以資差遣至澄海地方應將澄海協改爲澄海營卽將大鵬參將移駐作爲澄海營參將澄海原有守備二員分爲左右二營左營守備駐劄蓬州所城右營守備駐劄樟林

所城均未便移改將大鵬左營守備改爲澄海左營中軍守備駐劄縣城經管兩營錢糧其澄海左營守備改爲左營左軍分防守備仍駐蓬州有營仍循其舊以資防守所有現改大鵬協副將都司及澄海營參將左營中軍守備左營左軍分防守備俱照舊定爲外海水師題補之缺其水陸各營抽撥兵丁所需糧餉公費紅白等項以及一切軍裝器械俱由各營撥出隨帶毋須另添澄海協改駐參將守備有原設副將

都司衙署可以棲息辦公大鵬所城改設都司  
亦有守備原署可任其防守礮臺弁兵卽在礮  
臺均毋須另建衙署惟大鵬添設大快船二隻  
各營無可抽撥應另行製造計每隻需用裝造  
工料銀四百三十二兩二船共銀八百六十四  
兩歲需弁兵口糧燂洗以及修費等項約需銀  
一千四百餘兩又九龍地方改駐副將紅香爐  
添設汛防應建衙署兵房以及大鵬新兵應製  
號衣器械等項所需經費均須預籌查有前山

營生息一項從前係由洋商捐出本銀十萬兩  
發交當商生息以作添設前山營兵餉之用除  
每年支用外截至道光十九年五月底止實存  
銀五萬三千八百餘兩除另摺

奏請動支添建尖沙嘴官涌兩礮臺工料其銀三  
萬一千九百餘兩外所有此次添造快船及建  
造衙署製給新兵號衣器械等項用費均請於  
此項息銀內動支毋庸請動

帑項如此改調添設因地制宜似於海疆控制大

有裨益如蒙

俞允所有添造快船應建衙署兵房製給新添步守  
兵丁軍械等項臣等卽飭令地方文武會同確  
估辦理其改設副將等官應行鑄換關防並一  
切營制抽撥細數及未盡事宜統容另行咨部  
核辦再前山營生息本銀係由洋商捐出與正  
雜錢糧不同每年止將收支實存數目報部查  
核今請動支此項息銀以作添造快船衙署製  
給軍械經費應俟動用後將支用總數於冊內

開除造報懇免備造工料細冊報銷合併陳明  
臣等謹會同廣東水師提督臣關天培陸路提  
督臣郭 合詞恭摺具

奏伏乞

皇上聖鑒訓示謹

奏

請將烟犯財產充賞片

再粵東鴉片之多本什百於他省自上年查辦  
至今除收繳夷躉二萬餘箱外其起獲內地民  
人與販囤藏者亦不下五十餘萬兩皆經陸續  
燬化期於盡滌前污察看各屬府縣城廂凡在  
耳目昭著之地大都漸就肅清而鄉曲郵莊山  
重水復往往恃其僻遠藏垢納污舊時既不少  
窩存聞拏又轉相寄頓或深房密室守以婦女  
而莫能窺或祠廟山林埋以坑窖而無由識甚

至裝爲棺柩假作墳塋詭祕萬端出人意表間  
有訪聞破獲者全藉眼線密爲伺察於其藏匿  
處所探知真確乃得搜起原贓若眼線不真搜  
查無獲則奸民有所藉口轉恐釀成事端故從  
前烟禁鬆時患在得規包庇迨禁嚴而情僞疊  
出又患在託名慎重瞻顧畏難蓋趨避者衆人  
之常情而因循者官場之積習以爲拏獲不多  
不過責以䟽懈若辦理不善卽恐坐以愆尤而  
且僱線先須給資獲案又須重賞賞不重則作

線之人不來卽來者亦必不確其能爲精確之  
眼線必與烟犯素相親密之人所以不避怨嫌  
引官指拏者無非圖利耳激於義憤固無其人  
挾仇邀功亦不多見惟利重則衆人爭趨雖親  
密者亦不相顧此粵東風氣一時難以轉移而  
不得不乘機以導之者也官子以利卽爲官用  
否則走私護私皆其慣技未有不轉爲私用者  
矣爲私用則私愈不得破而官愈不得知故官  
必須不惜重貲而後能用此輩然近日州縣無

論其未必樂於捐資卽欲捐而無可捐之資亦  
安得而責之若營汛武弁則潔已者已難其人  
更何從語以出資僱線之事雖臣等於報獲案  
犯疊經捐銀給賞而究不足爲常外此則籌款  
勸捐事皆窒礙倘因無資購線以致若輩轉助  
販私則長惡滋奸所關匪細查上年軍機大臣  
議准浙江撫臣烏

奏立禁烟章程內稱嗣後守口兵弁能將商漁船  
隻所帶成箱烟土拏獲者將船及貨一半賞給

首獲之人餘貨分賞同查之人又海船偷帶烟  
土無論舟人行戶能將藏匿處所指明首告卽  
將船貨給予舉發之人等語是海船夾帶鴉片  
首報之人卽時得邀重賞而內地之窩販似亦  
可以例推且新例窰口烟館興販之本犯與知  
情租雇之業主船戶其房屋船隻皆應一律入  
官是破案之後產業已爲官物然若必俟由官  
召變始以價銀充賞則延緩需時竊恐有名無  
實仍不足以示勸蓋州縣承領估變例應會同



委員勘造估冊上下衙門層層駁估總須報部核定方能作準往往累月經年十不變一而空房封鎖已爲鄉鄰作踐匪可潛蹤又安得有人承受有司憚於賠累甘受遲延處分故歷來入官未變之產案牘纍纍皆其明驗也竊思信賞必罰法旣不可枉膏亦不可屯與其候變無期何若卽時充賞且如米穀出洋被獲本有船貨給賞之條而卡隘緝拏私鹽亦有車畜並賞之例今鴉片之害較之私運米鹽奚啻霄壤則報

獲之賞似亦不可獨虛應請嗣後拏獲販賣鴉片之案於審明定讞後除烟土烟膏烟具悉數繳官燬化外所有該犯船貨產業概准分別給賞無論在洋在岸一體照行倘有栽烟誣賴希圖冒賞亦必確審實情遵照新例不分首從按法嚴辦庶查拏首報之人有所圖而不相隱庇亦有憚而不敢誣妄而囤販爲奸之輩藏烟雖密破案不難於杜絕根株似有裨益如蒙

俞允所有粵省已獲各案臣等均卽飭屬遵辦並請

免其造冊咨部以省案牘是否有當謹合詞附片具

奏伏乞

聖鑒訓示謹

奏

焚剿夷船擒獲漢奸摺

奏為欽遵

批諭嚴密防範暎夷並經設法焚剿夷船辦艇擒獲接濟漢奸謹將辦理情形恭摺

奏祈

聖鑒事竊臣等前次附片具

奏暎夷逗留外洋常懼火船猝往焚燒並傳聞該

國有大號兵船將至加意嚴防各緣由欽奉

硃批無論虛實總當不事張皇嚴密防範以逸待勞

主客之勢自判彼何能為也勉之欽此仰見我

皇上運籌決勝洞燭夷情臣等跪誦服膺莫名欽感

伏查暎夷近日來船所配兵械較多實仍載運

鴉片探係該國嗚喇等處夷埠聞知內地辦

烟嚴緊銷路日稀而夷埠新舊烟土存積纍纍

不肯輕棄是以減跌價值用三桅大船滿載而

來而奸夷遂藉以揚言恫喝冀可准其貿易之

求迫見臣等拒之益堅不為所動其到粵之吐

噬嘩論嘯噲噲兵船三隻並現在續到之咯吧

吐兵船一隻亦祇在外洋往來游奕此東彼西

總無定處日則暗放三板分運烟土引誘奸民

零星賤賣夜則拋錨寄棹並招集辦艇環護支

更瞭望以防我兵火攻此外別無動靜誠如

聖諭實無能為惟思峻拒暎夷原為斷絕鴉片乃奸

夷仍私在外洋售賣即奸民必販至內地行銷

積弊何日能清前功尤虞盡棄且該夷詭計百

出竟不憚虧本以誘愚民查近日公班大士一

箇僅賣洋銀五六圓較之前年秋冬價減十分

之七並訊據先後獲到烟犯供稱有以鵝鴨十隻換得公班土一箇者並有買過一二次即可向夷人賒烟者在彼總欲愚弄沿海之漢奸以阻撓當官之禁令實屬可惡已極臣等於前次燒燬接濟匪船二十三隻之後仍嚴飭水陸文武力拏通夷匪犯並設法懲創奸夷因其防備甚周末易乘機下手先於四月間接據新安縣知縣梁星源稟報會同營弁在小濠海邊續燒辦艇四隻蓬寮五間又獲夷船上厨工梁亞次

等六名除與所獲潛買烟土各犯並案審辦外一面函商水師提臣關天培以夷船最畏焚燒仍惟以所畏者設法制之隨經關天培委令副將李賢都司馬辰守備黃琮盧大鉞林大光選帶能事把總潘永綦楊雄超廖鎮邦關東及外委盧麟等密授機宜相度形勢分帶兵勇四百餘名暗伏島澳並多雇素諳夷語線民假裝濟夷辦艇作為內應仍於各隘口分派弁兵防堵五月初九日乘夜半月落時候各隊火船移近

磨刀外洋夷船聚泊處所占住上風出其不意  
火船闖進來燒各線民亦於假辨艇內同時縱  
火有吧哩夷船上身穿白衣映夷持械跳出經  
外委盧麟揮合水勇方亞早等奮力殺斃四人  
其餘夷眾連船全行燒燬各將備督率把總潘  
永蔡楊雄超等乘夷船亂奔之際將火箭火礮  
噴筒等物紛紛拋擲又將載有烟箱之夷船燒  
燬一隻另有夷船一隻桅帆著火棄棹駕逃經  
夷眾將火撲救先後延燒大小辨艇十一隻又

燒燬近岸篷寮九座其衝突竄逃各夷船彼此  
撞碰叫喊不絕夷人帶傷跳水燒斃溺斃及被  
烟毒迷斃者不計其數我兵並無被害惟於殺  
斃吧哩船上夷人時有水勇二名被夷劍斫傷  
手膀尚不甚重該將備等於火發後分投截擊  
逸艇適有罌船一隻慌忙奔竄當將人船並獲  
其船內有烟盒烟槍及各種烟具一併起出又  
有棄艇逃赴篷寮及由篷寮復逃之犯亦俱擊  
獲計先後獲犯姜亞連等十三名現在行提嚴

審辦理此次該夷猝遭焚剿傷斃已多而噶  
嚕噎船上帶兵之夷官噴碎啞哩亦在該船病  
斃並查悉夷兵吸水受毒患病者甚眾似此頻  
經受創當亦其知

天朝重地非么魔異類所可玩法偷生如再抗不回  
帆抑或別滋奸計臣等仍惟恪遵

批諭不事張皇明則以逸待勞倍森嚴而鎮靜暗則  
相機而動期震讐其貪頑一切機謀密之又密  
以仰副

聖主訓誨諄諄之至意至暎夷未銷貨物恐其私行  
寄頓影射進口節經臣等會同粵海關監督臣  
豫堃逐一嚴查卽他國貨船中稍有形蹟可疑  
者如咪喇啞國之嘔吐一船吐嘔一船呂宋國  
之吻噸一船因查閱該國船牌貨單譯出漢文  
與現船所載貨物未盡符合立卽逐出不准進  
口嗣後尤當時加釐剔務使各國夷人咸知法  
度嚴明不敢希圖朦混以肅海禁而絕詭謀所  
有現辦情形謹會同水師提督臣關天培恭摺

具

奏伏乞

皇上聖鑒謹

奏

查獲汎弁黎祥光等串詐客船片

再粵東河道綿長時有匪蹤出沒不得不分遣  
兵役管駕巡船往來梭緝而查弊之人難保非  
卽舞弊之人是以疊飭縣營嚴查舉發不准稍  
有徇庇茲據署清遠縣知縣黃炳然三水縣知  
縣浦國仁先後稟報有南海縣客民林裕利在  
韶州府城買得鐵釘一百五十餘擔領有關口  
稅單遣夥曾顯揚雇船運赴佛山發賣本年三  
月初六日船至清遠縣石基河面被巡船搬搶

鐵釘一百一十餘擔尚存三十餘擔初九日船  
至三水縣胥江河面復被該處弁兵搬搶均勒  
寫失水字據原領稅單被初處搶鐵船上丟棄  
河中經該事主林裕利之兄林裕勝呈報該二  
縣會營勘訊通稟並據各該管將領查明揭報  
將汎弁黎祥光歐國泰盧廷彪黃安邦同各汎  
兵何得剛等並請斥革解省審辦臣當即提訊  
據該汎弁兵僉供因清遠營大燕汎一帶水溜  
河寬恐有販私偷漏會倩線民密加偵探本年

三月初六日線民白亞彪報有客船運載私鐵  
經過該汎目兵何得剛稟明界排汎額外歐國  
泰轉告把總黎祥光帶同三四兩號巡船駕至  
石基河面趕赴客船聲稱緝私起出鐵釘搬入  
四號巡船其時客夥會顯揚祇以空言分辯初  
未說有稅單迨把總黎祥光趕到詢以若非私  
販有何為憑該客夥甫將稅單呈驗該把總始  
知誤向搜查而四號巡船已搬有鐵釘七十二  
簍先載回營該把總慮被控告當將稅單丟棄



河中台寫失水字據希圖寢事該客船仍載餘鐵前行其大塘汛外委黃安邦亦因線人誤報帶同本汛及附近各汛兵丁駕船至三水縣胥江河面守候初九日見該客船經過指爲走私搜得鐵釘三十二隻搬載回汛該客夥將原有稅單被大燕汛弁丟棄合寫失水緣由詳晰言明該弁兵亦恐告發令其照寫失水字據船聽開行各汛弁所起鐵釘均已賣銀分用此訊據大燕大塘等汛各弁兵所供客船經由清遠二

水兩縣石基胥江河面先後被搜鐵釘之大略情形也查該客船所載鐵釘既執有開口稅單自非私販大燕等汛弁兵卽使先係誤搜迨見稅單何以不卽還贓轉向勒寫字據且大燕汛旣經搜過未將人船截留大塘汛弁兵何得更疑其爲走私將鐵釘全行搬載回營况鐵釘並未繳官竟各瓜分售賣明係假巡緝爲由串同搶奪迨發覺提省復因事主客夥未到恃無質證隱匿真情卽各該管守備亦難保無庇縱情

事現將清遠右營守備伍志雄署三水營守備  
事干總余孔彰均先撤任調至省城備質員缺  
另委接署其犯事之把總黎祥光盧廷彪外委  
黃安邦額外歐國泰同各汛兵何得剛等一併  
褫職革糧發司飭傳事主客夥勒集未到犯證  
研審確情據實按擬照例分別

奏咨外臣與撫臣暨水陸提臣仍嚴飭各文武於

員弁兵役實力稽察防閑如有散法營私務卽  
痛加懲創以安商庶而靖地方謹將查獲弁兵

串詐現在審辦緣由附片奏

聞伏乞

聖鑒謹

奏

追奪張石氏 誥封摺

奏為核辦控案查有再醮婦女冒受

封典應行追奪

誥軸以重名器恭摺

奏祈

聖鑒事竊照本年二月間有籍隸新會縣寄居南海  
縣之張石氏赴臣衙門遞呈以伊夫原任福建  
聞安協副將張保在日曾於嘉慶十五年間將  
銀二萬八千兩交付職員伍耀南生息置產有

書信收單爲據道光二年夫故四年該氏自閩回粵上年二月向討被吞控縣未結等情當查張保卽係嘉慶年間投誠之洋盜張保仔曾任副將身故其生前果否將銀託人置產被吞自須查有確據方可著追卽經批司飭縣錄案由送核辦並因張石氏呈內自稱命婦果否受有誥封亦須查明以防假冒去後茲據南海縣知縣劉泰師陸稟覆此案據張石氏與伍耀南在縣控訴訊無中證爲憑所繳信單飭令伍耀南當堂寫

字核對筆蹟迥不相符該氏現年六十五歲先嫁鄭一爲妻夫故之後改嫁與張保爲繼室道光元年曾經請有

封典稟請核辦前來臣查張石氏自閩回粵十有六年其夫張保在日果有交存伍耀南銀二萬八千兩何肯任欠多年近始出控且旣稱嘉慶十五年交銀置產維時張保已在廣東省城入伍何難將伍耀南代置各產之契收回執業而轉任其侵收花息至三十年之久尤非情理况所

林文忠公政書 卷三  
執信單乃本案要據經該縣比對筆蹟絕不相符又無中證爲憑明係捏造圖詐業已飭縣速行究結勿任狡延至張石氏前夫鄭一乃從前廣東洋盜之渠魁黨夥蔓延橫行海上倖逃顯戮自伏冥誅張保卽張保仔本係蠶戶幼嗣鄭一爲子並受安南國僞封鄭一斃後接管幫船所聚大小匪艇數百隻盜夥數萬人劫掠商民戕傷將士其罪逆更有甚於鄭一粵省濱海郵莊受其荼毒之慘至今閭巷傳聞痛心切骨卽

嘉慶十五年閒悔罪乞誠其中反覆情形亦非一次均有舊案可稽當時在事諸臣舍剿言撫亦係爲民蘇困事出權宜現在遞呈之張石氏卽鄭一之妻改適張保以疊作萑苻之眷屬竟濫邀程第之光榮是其名節俱虧實恐玷汗章服查命婦夫亡再嫁按律尙應擬罪追奪所以勵貞操而重名器也今張石氏係再嫁後請封尤爲冒混現尙恃係命婦平空捏詐纏訟不休自應奪其原請

詔軸送部察收仍將該氏飭族約束稽查庶足以儆  
奸邪而維風化臣謹會同廣東巡撫臣怡良恭  
摺奏

聞伏乞

皇上聖鑒訓示再查張保之子張玉麟曾蔭千總現  
年二十七歲並未投營亦有被控聚賭之案併  
飭審明虛實另行覈辦合併陳明謹

奏

暎夷續來兵船情形片

再暎咭喇夷船逗留外洋臣等疊飭各將弁帶  
領兵勇火船設法焚剿於五月初九日乘夜縱  
火燒燬夷船三隻業經會摺奏

間在案查該夷自貿易斷後每揚言兵船多隻即日  
到粵臣等不爲所動而仍密爲之防除上年所  
到之吐嚙嘩喻兩船與近時續到之啣嚙噎啞  
吧吐兩船在外洋游奕情形先已查明具

奏外茲據澳門文武稟據引水探報五月二十二

日望見九洲外洋來有兵船二隻一係大船有礮三層約七八十門其一較小有礮一層二十三日陸續又來兵船七隻均不甚大礮位亦祇一層又先後來有車輪船三隻以火焰激動機軸駕駛較捷此項夷船前曾到過粵洋專爲巡風送信茲與各兵船或泊九洲或赴磨刀或赴三角外洋東停西竄皆未敢駛近口門臣等查中路要口以虎門爲最次卽澳門又次卽尖沙嘴一帶其餘外海內洋相通之處雖不可勝數

然多係淺水暗礁祇足以行內地之船該夷兵船不能飛越所有虎門各礮臺先已添建增修與海面所設兩層排鍊相爲表裏猶恐各臺舊安礮位未盡得力復設法密購西洋大銅礮及他夷精製之生鐵大礮自五千斤至八九千斤不等務使利於遠攻現在該處各礮臺計有大礮三百餘位其在船在岸兵勇隨時分撥其有三千餘名至澳門地方自

奏委高廉道易中孚與

奏留升任之香山協惠昌耀會同防範先後派駐  
兵勇亦有一千三百餘名又尖沙嘴一帶新建  
礮臺兩座業已趕辦完工並設法購辦大礮五  
十六位分別安設其附近山梁駐兵其有八百  
餘名此外各小口及內河水陸要隘亦皆添兵  
多名協同防堵聲勢已皆聯絡佈置並不張皇  
現在該夷兵船亦祇飄泊外洋別無動靜即使  
此後漸圖窺伺而處處皆有準備不致疎虞此  
時商旅居民極爲安謐卽他國在澳夷人亦皆

各自貿易安靜如常而臣等密察周防總不容  
一刻稍懈且隨處偵拏接濟嚴斷漢奸務令盡  
絕句通俾其坐困第恐在粵無可乘之隙該夷  
船趁此南風盛發輒由深水外洋揚帆竄越臣  
等現又飛咨閩浙江蘇山東直隸各省飭屬嚴  
查海口協力籌防以冀仰紓

宸念謹合詞繕片附陳伏乞  
聖鑒謹

奏



奏報嗣於五月二十二三等日又到大小兵船九  
隻車輪船三隻遊奕外洋東停西竄臣等示以  
鎮靜不事張皇而仍嚴密周防於水陸各要隘  
加礮添兵處處準備並嚴挈接濟杜絕旬通復  
將籌辦情形於五月二十五日附片奏

噴夷兵船情形片附夷帖

再噴咭喇來粵兵船除上年所到之吐噠嘩喲  
兩船及本年續到之啣嚕噶吧吐兩船先經  
隨時

奏報嗣於五月二十二三等日又到大小兵船九  
隻車輪船三隻遊奕外洋東停西竄臣等示以  
鎮靜不事張皇而仍嚴密周防於水陸各要隘  
加礮添兵處處準備並嚴挈接濟杜絕旬通復  
將籌辦情形於五月二十五日附片奏

聞在案茲查近日該暎夷又先後到有大小兵船十隻車輪船二隻仍止散泊外洋別無動靜並揚言不先尋釁諒欲懈我軍心旋於海灘上插一木牌寫有漢字說帖妄稱內地船隻不准出入粵省門口俟英國通商再行無阻又稱魚船日間出入不爲攔截各邑鄉里商船可赴英國泊船之處貿易等語查暎夷中有嗎哩遜能書漢字上年一切夷稟皆出伊手此次說帖諒卽該夷人所寫揣其鬼蜮伎倆一則希圖挾制通商

一則招引奸徒興販與其所稱不先尋釁之言又大相刺謬當經函囑提臣關天培如果該暎夷膽敢攔阻行舟卽當示以兵威不容滋擾又查該夷說帖內有國主命伊前往中國海境據實奏明之語而先來之咯吧吐一船及後到之唏唻嘛等船八隻車輪船三隻又據引水稟報於五月底及六月初間先後駛出老萬山東向揚帆而去瞭望無蹤飭據洋行總商伍紹榮等轉呈咪喇啞夷稟譯出漢字內稱聽說暎夷兵

船係赴浙江江蘇又有人說往天津等情臣等  
復查夷情詭譎凡事矯飾虛張固難憑準而現  
值南風盛發外洋茫茫無界限亦無從遏止前行  
如其駛至浙江舟山或江蘇上海等處該二省  
已疊接粵省咨文自皆有備不致疏虞若其逕  
達天津求通貿易諒必以爲該國久受  
大皇帝怙冒之恩不致遽遭屏斥此次斷其互市指  
爲臣等私自擅行倘所陳尙係恭順之詞可否  
仰懇

天恩仍優以懷柔之禮

勅下直隸督臣查照嘉慶二十一年閒暎國夷官囉

呬啊嘆吐噫等自北遣回成案將其遞詞人由  
內河逐站護送至粵藉可散其牙爪較易就我  
範圍倘所遞之詞有涉臣等之處惟求

欽派大臣來粵查辦俾知

天朝法度一秉大公益生其敬畏之誠不敢再有藉  
口事關控制外夷臣等管窺所及謹合詞附片  
密陳並將該夷說帖另錄清摺恭呈

御覽伏乞

聖鑒訓示再沿海閭閻現俱照常靜謐合併聲明謹  
奏

抄錄夷帖

謹將暎夷兵船所出漢字說帖鈔錄清摺恭呈

御覽

大英國特命水師將帥為通行曉諭事照得粵

東大憲林鄧等因玩視

聖諭相待英人必須秉公謹度輒將住省英國領事  
商人等詭譎強逼捏詞詎騙表奏無忌故此大  
英國主欽命官憲著伊前往中國海境俾得據  
實奏明

御覽致使太平永承妥務正經貿易且大英國主恭  
敬

皇帝懷柔內地安分良民嚴命本國軍士設使民人  
不爲抗拒卽當凜行保全各人身家產業是則  
該民無庸驚懼乃可帶同貨物接濟赴到英師  
之營況定要施惠保護給爾公道價錢也且大

憲林捏詞假奏請奉

皇帝停止英國貿易之諭以致中外千萬良人吃虧  
甚重緣此大英國將帥現奉國主諭旨欽遵爲

此告示所有內地船隻不准出入粵東省城門  
口兼嗣後所指示各口岸亦將不准出入也迨  
俟英國通商再行無阻本將帥纔給符官印發  
檄曉諭所應經商之港口不爲攔截又沿海各  
邑鄉里商船亦准往來可赴英國船隻停泊之  
處貿易無防特示

嚴辦烟案裁贓入犯片

再臣等嚴拏鴉片尤必重辦裁贓緣差役眼線皆非正人在密查暗訪之時斷不能不用而假公濟私之弊實不可不防是以諳飭各屬凡帶差役線人查拏烟案必先將其人搜檢一過無夾帶者方許上前又獲到烟犯一名即令獲犯之人將如何查拏情形當堂詳細供指使烟犯聞知無可置喙然後再向該犯追究鴉片來歷以成信讞而杜侵欺第烟犯情節各不相同有

不必栽贓者亦有不能栽贓者如平日本係著名窩口及積慣與販早爲人所共知或聞拏先逃久而始獲則雖棄贓滅迹亦不能末減其辜其或首夥先後到案供證僉同或查獲帳簿發單已有賣烟確據則亦不待起出鴉片始能定其罪名所謂不必栽贓者此也又如盈箱累篋攙入別貨之中地窖夾牆藏於密室之內一經破獲爲數孔多非外人所得預埋卽挾仇亦難誣陷則犯供雖或狡展而眾證卽是確憑所謂

不能栽贓者此也所最宜防者惟零星之小土與熬熟之烟膏價賤物微人心因而叵測每獲此種烟犯臣等無不加倍留神如本年三月間有清遠縣人鄧亞帶假造烟膏裝貯一小錫盒預藏莫亞三柴船內商囑譚亞得張安等引同差役往拏圖詐當經訪獲訊認不諱又據番禺縣獲到羅定人李亞有糾同林亞土陳超等攜帶烟膏至番禺縣桑周氏家藉搜查鴉片爲名搶得番銀及首飾衣服等件又據歸善縣營會

獲兵丁何連升等將鄉民首繳之烟土二塊向王大受羅亞玉等栽害藉稱搜查搶取番銀四員八員不等又據新會縣訪獲從九品職銜周如齡卽周超宇因素知同縣之張亞信有錢怕事商同族弟周導澄等攜帶烟槍一枝烟盒一筒指爲張亞信之物將其擄捉圖詐銀三百兩未成經該縣訪獲周如齡質認屬實此外未經栽贓平空訛詐之何伯達等及甫造假土卽被訪緝之周亞榮等亦經逐一拏獲隨時發審飭

屬按例嚴辦總期法無枉縱罪當情真庶足折服人心卽以湔除積習謹將歷辦情形合詞附片奏

聞伏祈

聖鑒謹

奏



暎夷兵船移泊校椅沙情形片

再暎夷兵船先後到粵內有數船復出老萬山

俱經<sub>臣</sub>等將來去情形隨時

奏報並該夷寫有漢字說帖妄稱欲阻內地行舟  
及該國王遣令前往中國海境奏明等語又經  
照錄夷帖恭呈

御覽在案茲查六月初十前後該暎夷兵船內有七  
隻及車輪船二隻又陸續開出老萬山揚帆遠  
去而日內據報復到有兵船三隻難保非即前

開之船去而復至統計現在共有夷船十隻雖  
仍散泊外洋而閒有一二船乘潮駛至相距虎  
門五十餘里之校椅沙一帶遇見內地出入之  
鹽船商船卽潛遣三板攏近探詢官兵消息迨  
內地各船駛近口門則又不敢追問蓋夷船所  
恃專在外洋空曠之處其船尙可轉掉自如若  
使竟進口內直是魚遊釜底立可就擒勦辦正  
有把握而彼亦揣摩已久深悉情形不敢冒死  
輕入每日東飄西泊莫定行蹤夜更遊奕不停

深恐我兵復用火船潛往燒燬揣其狡獪伎倆  
無非挾制通商勢不得不示以兵威難容久滯  
此時水陸各要隘悉已周防一切制勝機宜均  
與水師提臣關天培密爲商定因現值南風盛  
發師船出口係向南行尙須加意慎重一得可  
乘之隙卽當整隊放出外洋大張撻伐臣等相  
機籌辦總求計出萬全不許將備弁兵藉口遷  
延亦不敢任其孟浪至民間習見夷情虛矯仍  
俱靜謐如常堪以仰紓

宸注所有近日夷務情形謹合詞繕片附陳伏乞

聖鑒謹

奏

議覆葉紹本條陳捕盜事宜摺

奏為遵

旨查議捕盜事宜謹就粵省情形力加整頓恭摺覆  
奏仰祈

聖鑒事竊准部咨欽奉

上諭鴻臚寺少卿葉紹本奏捕盜事宜一摺著各直  
省督撫妥議具奏欽此臣等查原奏臚列四條如  
移會隣封協捕嚴懲牌保容留守望宜責同郵  
審案不累事主此皆申明定例自宜實力奉行

况粵省盜賊視他省爲尤熾是以例上另立專條以廣東內河劫案夥聚四十人以上或行劫三次或脫逃二三年後就獲應斬決者均加臬示恭請

王命先行正法誠以海濱蠻野不得不加倍從嚴也  
臣等竊見廣東弭盜之難別有數端而尋常之弊不與焉一則良盜難分也他省之民良自良而盜自盜廣東不然平時耕種之民遇有黃夜糾劫者但以發財去三字隨路招呼鮮不欣然

同往故一同爲盜之人彼此每不相識卽人數亦無可稽甚至田舍素封衣冠巨族亦皆樂於一試若惠潮地方則竟有以盜起家轉因黨與太多不能破案人不敢指官不得拏者並有通族皆盜通鄉皆盜一拏卽恐滋事不得不略審機宜設法誘獲者此盜風所以未易戢也一則互劫難防也他省之盜只圖得財廣東之盜並因仇起此邨往劫彼邨此縣往劫彼縣爲盜者並非貧苦竟以挾釁行強被盜者不卽呈官輒

先糾人報復迨事過則彼此互控各匿真情並指局外為主謀扳富家為窩主案情變幻歧之又歧此盜情所以未易詰也一則原賊難起也盜案以賊為憑賊真然後盜確故別省緝盜之法以查賊為先廣東則盜賊移赴墟場無不立時賣盡及至輾轉售賣大都不識姓名是以歷辦盜案獲賊者少無獲者多部臣查核案情亦皆覆准此係歷久相沿辦法今若必令逐案起賊又恐差保藉端向當舖衣莊索詐而犯之狡

展案之懸宕將因是而愈紛此辦法之未易輕改也一則夥黨難究也訪聞粵東巨盜每先密結親信匪黨發誓拜盟如遇破案到官彼此各自熬刑不相供指即獲正賊嚴訊往往供出同夥非富即仇雖傳到審虛立時省釋其人業已受累而真夥未經供出聞風轉已遠颺地方官即設法訪查驟難得手至各縣紳衿中多有攻匪保良之公約不知起自何時其始所保所攻未嘗不當追久之而漸成袒庇難免黑白混淆

臣等惟當諭令禁止以祛流弊此查緝之未易得實也一則花紅難繼也廣東積習官欲獲盜必須先出花紅從前原為急公迨後竟成常例盜愈著名則花紅愈重若稍吝嗇即無從購覓線人其有關於官員處分者家屬親隣愈以居為奇貨即臣等亦有欲禁而不能驟禁之勢況花紅而外解犯辦罪所費尚多地方官年遇數起盜案賠累多端恐開虧挪之漸此經費之未易措籌也以上各情形臣等惟有隨地隨時力

加整頓總必求臻實效不使徒托空言即如保甲為弭盜之源而奉行非循故事巡警為詰奸之要而委用務在得人凡水路之巡船陸路之更練沿邨之望樓保寨均不許有名無實除本年春夏二季獲犯一千三百八十八名已於另摺核

奏外仍惟諳飭水陸文武各員勤益加勤密更求密永冀萑苻斂戢閭井安恬以仰副聖主綏靖海疆除莠安良之至意所有遵

旨查議緣由據司道會詳前來謹合詞恭摺覆

奏伏乞

皇上聖鑒謹

奏

暎逆兵船續籌勦堵摺

奏爲暎逆在粵兵船雖未敢滋事而漸有擄船尋  
釁情形現又續添兵勇酌籌水陸勦堵以期早  
靖夷氛恭摺

奏祈

聖鑒事竊照暎咭喇兵船陸續到粵去住靡常截至  
本年六月下旬尙存七隻業將往來船數並周  
密防堵情形隨時奏

聞在案該暎夷自上年斷其貿易以來日播浮言或

稱卽有多船踵至或稱攔截內地行舟無非挾制通商圖銷鴉片臣等恪遵疊奉

批諭不事張皇而各口防兵倍加嚴整彼見拒之甚力無隙可乘故來者旣隨到隨開卽在者亦旋停旋駛是先前猶未尋釁尙可使之自困不值海上交鋒今則已在浙洋妄肆鴟張罪大惡極自知上干

天朝震怒難望仍準通商在粵夷船遂亦漸形猖獗竟將海運鹽船先後擄去十四隻甚至槍斃民

船舵工盛全幅一名並傷水手杜亞發一名華民憤切同仇指引弁兵在洋掣獲白夷吐咄噸一名黑夷嘶喇及吃吐兩名解官究辦該暎夷又信托在澳西夷代求釋放並稱如不允準卽欲進澳滋擾藉端恫喝情實難容雖現在暎夷兵船七隻內又向老萬山外駛去一船其火輪船去而復回者亦止一隻惟該國尙有載貨帶烟各船約二十餘隻同泊在洋其船亦有礮械難保不串謀生事亟應痛予勦除前經陸續調



集各營大號米艇二十隻並雇募紅單船二十隻拖風船二十六隻於選配兵丁之外復募挑壯勇千餘名製配礮火器械遴委將備管帶先於內洋逐日督操以備戰攻之用又前後購備大船二十餘隻均交水師提臣關天培分派各將備隨帶應用臣林則徐擬於本月二十日帶印登舟赴離省八十里之獅子洋將所練各兵勇親加校閱如技藝均已精熟卽擇日整隊令其全出大洋併力勦辦臣林則徐亦赴虎門駐

劄與提

臣

就近籌商隨時調度

臣

怡良現值文

闡期近仍駐省城支應一切署廣州將軍臣奕

副都統

臣

英

先於五月間聞有暎夷兵船

來粵卽經預選滿營水陸精兵一千名咨會

臣

等隨時調遣當因省垣重地防守尤爲緊要仍令按段稽察以備策應而壯聲威惟查師船在大洋接仗恃佔住上風仍須相度機宜於風潮順利之時始令進發不敢輕率僨事亦不敢遷延失時如能迅獲勝仗擬卽由驛奏

聞仰紆

聖廕至澳門地方久爲暎夷所覬覦而西洋中奸良不一亦難保無暗與勾結之人卽此次所獲暎夷與西夷本無干涉而乃代爲稟求釋放並以進澳滋擾之言虛張挾制雖所獲暎夷無足輕重然此時若徇所請則損威示弱轉無以戢叵測之心臣等不得不嚴行批駁惟西夷旣稱兵單力薄各有戒心自應振我軍威於代爲保護之中卽寓鈐制防維之道查澳門先調兵勇千

餘名在關圍一帶巡防兵力尙未甚厚臣等現又添調督撫兩標官兵連前其合二千名派委督標參將波啟善署肇慶協副將多隆武署撫標守備程步韓等帶入澳內與升任香山協副將惠昌耀等會合防堵仍責成

奏委駐澳之高廉道易中孚悉心籌策務協機宜不得稍涉優柔致貽後患並先曉諭西洋夷眾以澳門係

天朝疆土伊等累世受廕渥荷

深恩豢養今恐暎夷進澳滋擾該西夷力不能敵是以特遣重兵來澳與爲保護不使他族得以占居如西洋中竟有昧良之人潛與暎夷勾結卽須獻出懲治倘竟被其愚弄轉而阻撓官兵是大昧於順逆存亡之理必至玉石俱焚後悔何及且澳內一無出產日食所需悉資內地卽使暎夷占澳一經斷其接濟彼亦無以自存第不忍使西夷並受其害惟專心內向則外侮自不敢欺陵爲此明白開導諒西夷亦不至爲暎夷

所愚而澳門得此重兵當亦可期靜謐總使恩威並濟操縱咸宜以冀仰副

聖主綏靖華夷至意所有續籌勦堵情形臣等謹會

同署廣州將軍臣宗室公奕 副都統臣宗室

英 水師提督臣關天培陸路提督臣郭

合詞恭摺具

奏伏乞

皇上聖鑒謹

奏

英水師對粵... 同署... 聖子... 知... 德...

密探定海夷情片

再<sub>臣</sub>等因粵洋現有暎船自必常通浙信是以  
屢經設法密探定海情形偶有覓得夷信譯出  
漢文知此次領兵攻定海城者名曰哞嘛嘛其  
統兵之夷目一人名曰咖啞噫噙係東印度水  
師提督所坐夷船最大名曰麥爾威厘有礮七  
十四門該船進定海港口時碰於大礁之上底  
穿一孔入水甚深幾於沈沒又有帶兵夷官職  
分頗大之呵喇叻被我師打死現在暎逆甚望

定海居民回至該處與之同住而民人屢招不  
至所出章程亦無人肯信沿海漁船悉皆避去  
各夷船本係隨帶鴉片售作資糧今已火食無  
多轉瞬風色將轉均甚愁急等情是其伎倆之  
窮已可概見臣等竊思粵省民人患其與夷相  
習而此時浙省之民轉欲其習於夷而後便於  
行事若如夷信所言火食無多又恐風色將轉  
是正有可乘之機與其交鎔於海洋未必卽有  
把握莫若誘擒於陸地逆夷更無能爲或將兵

勇扮作鄉民或將鄉民練爲壯勇陸續回至該  
處詐爲見招而返願與久居一經聚有多人約  
期動手殺之將如雞狗行見異種無遺惟機緘  
不可洩露現聞該逆中有咕吐啦一名僞爲定  
海縣官其人能爲華言更須防其詭計臣等已  
具密函飛致浙江撫臣烏斟酌辦理第係遙  
揣情形未知當否謹再附片密陳伏祈

聖鑒謹

奏

具密函... 廣東... 欽此

關開地方礮石洋面疊將逆夷擊退摺

奏為粵省水陸官兵堵禦噴逆疊將逆船擊退傷

斃夷匪多名現仍遵

旨加緊嚴防恭摺

奏祈

聖鑒事竊照噴咭喇在粵兵船先俱散泊外洋未敢

生端尋覺追聞逆黨滋擾浙洋之信遂亦漸見

鳴張業經<sub>臣</sub>等將續調官兵雇船募勇酌籌勦

堵情形於本年七月十九日會摺奏

聞並陳明<sub>臣</sub>林則徐親赴離省八十里之獅子洋校閱兵勇就近調度在案拜摺後<sub>臣</sub>林則徐即於二十日至獅子洋泊舟將本年所派各備弁豫練壯勇技藝逐一親加校閱如演放大小礮位拋擲火毬火礮撒放火箭噴筒以及爬桅跳船各技與水師官兵一體演試均尚可觀隨即順赴虎門與水師提<sub>臣</sub>關天培熟商剿辦旋據防守澳門文武各員稟報七月二十二日未刻暎逆嘩喻喻等帶領該夷各兵船潛放三板十餘

隻與火輪船一隻乘東風長潮之際由九洲外洋駛至近澳迤北之關閘一帶突然開礮該處係前山營赴澳門經由旱路兩邊皆海中有天然甬道一條因在蓮花峯腳下土人象形名之爲蓮花莖其適中之地豎一關門並設有關閘汛把總一員稽查來往蓋以禁止住澳之西洋夷人不使越此而北也惟是澳門有西夷所立礮臺六座而關閘至前山一帶爲華夷交涉處所向無官建礮臺雖有把總酌帶汛兵巡防守

望而地當空曠除兵房數間之外障蔽全無臣等先已慮及逆夷伺閒擣虛恐必乘潮滋擾以圖洩忿早經添派兵勇協防該汛並飭據高廉道易中孚酌築土墩分置大小礮位是日在事文武瞭見夷兵船突如其來卽時開礮迎擊因該逆火船相距較遠其三板易於轉動見岸上礮口所向彼卽閃避故甫經交鋒之頃夷船被礮者無多迨聞內閣外官兵一齊趕到高廉道易中孚率同署澳門同知蔣立昂香山縣丞湯

聘三由南而北署肇慶協副將多隆武督標參將波啟善等由北而南署提標遊擊阮世貴等在中閒往來接應升任香山協惠昌燿率領師船駛至青洲海面水陸夾擊將夷船前後桅柁打傷並擊沈三板數隻礮斃逆夷落水者不計其數復有續至夷船趕來助勢經香山水師兵丁羅名贊曾有良麥朝彪三人連轟數礮立斃夷兵目一人及夷兵十餘名夷船且戰且逃至戌刻俱向九洲大洋竄去該洋潮勢最急不能



撈獲夷屍惟岸上及淺灘陸續檢獲夷礮彈子大小二百餘箇重十餘斤至三十斤不等計接仗至三四時辰之久查點我兵陣亡者六人壯勇內亦傷斃三人俱經優加獎卹其帶兵營員內參將波啟善與水師守備陳宏光頭面受傷均堪醫愈自關閘至澳門一帶咸保無虞署香山縣知縣吳思樹因訪聞逆夷尙謀進犯前山以圖報復卽由香山縣城挑帶鄉勇馳赴前山策應併雇繪船八隻在內河隘口堵禦

臣林則

徐當又添調南韶連鎮總兵馬殿甲帶兵七百名三江協副將陳連升帶兵三百名擇要分駐以壯聲勢計沿海陸路先後調防兵勇已及八千名布置俱甚聯絡又據水師探報逆夷兵船俱由九洲仍竄迤東之磨刀洋面間有駛至伶仃洋之北及礮石赤灣等處游奕

臣林則徐當

與提臣關天培在沙角海口鼓勵各船兵勇整隊出洋探蹤迎擊茲據稟報八月初五日卯刻在冷水角瞭見火輪船一隻駛至龍鼓面卽令

快艇及原雇拖風各船先往追躡各放礮火擊其船腰該火輪船卽刻逃去隨探得龍穴西南有夷兵船一隻其東首又有夷兵船四隻三板五隻我師追至申刻候選都司馬辰與護提標右營游擊王鵬年同坐一船首先攏近唵噫之船奮勇接仗督令把總李亮記委毛旭升連開三千斤銅礮二門將其前面頭鼻打壞其船上拉繩之人紛紛喊嚷滾跌落海該船先猶開礮回拒彈如星飛有礮子嵌入師船頭桅量深五

寸迨被我師攻敗傷斃多人夷眾手忙腳亂僅放空礮或係船上礮子用盡亦未可知是時有他船趕護前來又經師船開礮轟擊斷其繩纜不能駛進惟於我師回擊他船之際唵噫船卽乘隙隨潮南竄時已昏黑不及窮追當將各船收回於亥刻仍抵沙角查點弁兵受微傷者僅止數名卽被礮各船間有損壞亦皆易於修整次日據漁船撈獲夷帽五頂夷鞋二隻及夷船上打落油纜三節長二丈餘帆槓一根長九尺

餘又轉軸二箇係夷船起旋推舵所用均經繳到師船請賞併據稱初五日晚見有夷屍數十具隨潮漂去又據引水探報夷人撈獲屍具在磨刀山根瘞埋內有伙長一名礮手三名夷兵十一名併據新安縣稟同前情臣等查此次暎逆疊受創懲應知震懾惟其犬羊成性鬼蜮居心難保不別肆奸謀另圖報復又聞夷埠尚有兵船續至益當加意防閑且臣等前奏查知夷船越竄江浙緣由茲承准軍機大臣字寄欽奉

上諭著林則徐等嚴密周防於水陸各要處處準備併嚴拏漢奸毋使勾通接濟該督等仍當示以鎮靜不事張皇是為至要等因欽此謹即恭錄咨會提臣欽遵辦理查現在澳門虎門俱有重兵駐劄附近之香山新安等縣亦已撥械添兵慎固封守其四面當海之南澳達濠碇州瓊州等以及孤懸島嶼瀕海邨莊均飭處處準備併將出入之漁蟹各艇慎密稽查嚴杜勾通接濟仍與在事文武恪遵

訓諭務示鎮靜不許稍事張皇各市厘安謐如常足以仰紓

宸念所有連次勦堵逆夷情形謹會同水師提督

關天培陸路提督

臣郭

合詞恭摺具

奏伏乞

皇上聖鑒再

臣

怡良因鄉試屆期入闈監臨

臣

林則

徐卽由虎門回省合併陳明謹

奏

議覆團練水勇情形摺

奏爲遵

旨查議團練水勇情形恭摺覆

奏仰祈

聖鑒事竊准部咨道光二十年七月初二日奉

上諭給事中沈鏞奏請飭沿海各省團練水勇一摺

著沿海各將軍督撫等酌量地方情形妥議具奏

欽此並鈔錄原摺前來

臣

等查粵東漁人蜑戶以

及濱海居民多以採捕爲生不畏風濤之險士

人所稱為水鬼者隨在有之如新安縣之大澳香山縣之淇澳陸豐縣之高螺饒平縣之井洲向有善泅之人傳聞能於海底晝行夜伏並能於船底鑿漏沈舟上年粵省驅逐鴉片躉船臣林則徐與臣怡良暨調任督臣鄧廷楨密商即擬資以為用迨經雇募多名逐加演試亦僅能於內洋淺港往來鳧泛求其深泅數丈潛伏多時者實乏其人始知向所傳聞乃係言過其實茲臣阿精阿到任後留心諮訪並據副都統臣

宗室奕 告知前署將軍時亦曾於操練旗營水兵之便會同副都統臣宗室英 試過水勇技藝所見遠不及所聞然當防夷喫緊之時恐此輩被其勾作漢奸或為盤運鴉片利之所在不免爭趨仍惟收而用之在官多一水勇即在洋少一匪徒與給事中沈鏞現在所陳似已不謀而合又因粵省沿海口岸有三千六百餘里之遙額設水師兵丁實不足以敷分派自上年以來或由民間自行團練以保邨莊或由府縣

三  
卷四  
三  
雇覓壯丁以資捍衛卽如中路一帶所雇練勇  
用以協防礮臺隘口並配入拖風紅單等船者  
已有一千五百餘名疊次隨同焚勦暎夷藉可  
以壯軍威而助兵力惟是雇用此輩流弊亦多  
權宜雖在暫時而駕馭必須得法蓋其來從烏  
合非比有制之師而又獷悍性成每易藉端生  
事卽令舉出頭目亦係素與習熟之人分旣不  
足以相臨權亦不足以相制全在管帶之員弁  
猛寬並濟鈐束有方故當其招募之時卽令查

明親屬取具的保詳開名冊各給腰牌示以拊  
循厚其雇值平日勤加操練漸以化其囂陵臨  
事不藉衝鋒祇令備爲策應其犒勞賞卹仍予  
從優使有顧戀之心不萌他念第口糧安家一  
切用費較繁且若輩久處行閒習知虛實其中  
亦有所不宜故又須加意防維隨時稽察果能  
遵守紀律出力向前則留營酌編入伍否亦酌  
量資遣妥爲管束以杜日後非爲是雇募水勇  
之策係屬因時制宜而欲其能發能收則惟有

妥籌經理始可防其流弊也 臣等謹就粵省地

方情形遵

旨查議並會同廣州副都統 臣宗室公奕 臣宗室

英 合詞恭摺覆

奏是否有當伏乞

皇上聖鑒訓示謹

奏

密陳夷務不能歇手片

再 臣

厚恩天良難昧每念一身之獲咎猶小而

國體之攸關甚大不敢不以見聞所及敬為

聖主陳之查此次暎逆所憾在粵省而滋擾乃在浙

省雖變動若出於意外其窮感正在於意中蓋

逆夷所不肯灰心者以鴉片獲利之重每歲易

換紋銀出洋多至數千萬兩若在粵得以復興

舊業何必遠赴浙洋現聞其於定海一帶大張

招帖每鴉片一斤只賣洋錢一圓是卽在該國  
嗚啊啦等處出產之區尙且不敷成本其所以  
甘心虧折急於覓銷者或云以給雇資或云以  
充食用並聞其在夷洋各埠賃船雇兵而來費  
用之繁日以數萬金計卽礮子火藥亦不能日  
久支持窮蹙之形已可概見又夷人向來過冬  
以氈爲暖不著皮衣蓋其素性然也浙省地寒  
勢必不能忍受現有夷信到粵已言定海陰溼  
之氣病死者甚多大抵朔風戒嚴自然捨去舟

山揚帆南竄而各國夷商之在粵者自六月以  
來貿易爲曠夷所阻亦各氣憤不平均欲由該  
國派來兵船與之講理是該逆現有進退維谷  
之勢能不內卻於心惟其虛憍性成愈窮蹙時  
愈欲顯其桀驁試其恫喝甚且別生祕計冀得  
陰售其奸如一切皆不得行仍必帖然俛伏臣  
前此屢經體驗頗悉其情卽此時不值與之海  
上交鋒而第固守藩籬亦足使之坐困也夫自  
古頑苗逆命初無損於堯舜之朝我



皇上以堯舜之治治中外知鴉片之爲害甚於洪水  
猛獸卽堯舜在今日亦不能不爲驅除

聖人執法懲奸實爲天下萬世計而天下萬世之人  
亦斷無以鴉片爲不必禁之理若謂夷兵之來  
係由禁烟而起則彼之以鴉片入內地者早已  
包存禍心發之於此時與發之於異日其輕重  
當必有辨矣臣愚以爲鴉片之流毒於內地猶  
癰疽之流毒於人心也癰疽生則以漸而成膿  
鴉片來則以漸而致寇原屬意計中事若在數

十年前查辦其時吸者尙少禁令易行猶如未  
經成膿之癰內毒或可解散今則毒流已久譬  
諸癰疽作痛不得不亟爲拔膿而逆夷滋擾漸  
洋卽與潰膿無異然惟膿潰而後疾去果其如  
法醫治托裏扶元待至膿盡之時自然結痂收  
口若因腫痛而別籌消散萬一毒邪內伏誠恐  
患在養癰矣溯自查辦鴉片以來幸賴

乾斷嚴明

天威震疊蕙船二萬餘箱之繳係暎夷領事義律自

行遞稟求收現有漢夷字原稟可查並有夷紙印封可驗繼而在虎門燬化烟土先期出示準令夷人觀看維時來觀之夷人有撰爲夷文數千言以紀其事者大意謂

天朝法令足服人心今夷書中具載其文諒外域盡能傳誦迨後各國來船遵具切結寫明如有夾帶鴉片人卽正法船貨沒官亦以漢夷字合爲一紙自結之後查驗他國夷船皆已絕無鴉片惟暎逆不遵法度且肆鴟張是以特奉

諭旨斷其貿易然未有浙洋之事或尙可以仰懇

恩施今旣攻占城池戕害文武逆情顯著中外咸聞非惟難許通商自當以威服叛第恐議者以爲內地船礮非外夷之敵與其曠日持久何如設法羈縻抑知夷性無厭得一步又進一步若使威不能克卽恐患無已時且他國效尤更不可不慮臣之愚昧務思上崇

國體下懾夷情實不敢稍存游移之見也卽以船礮而言本爲防海必需之物雖一時難以猝辦

而爲長久計亦不得不先事籌維且廣東利在通商自道光元年至今粵海關已徵銀三千餘萬兩收其利者必須預防其害若前此以關稅十分之一製礮造船則制夷已可裕如何至尙形棘手臣節次伏讀

諭旨以稅銀何足計較仰見

聖主內本外未不言有無誠足昭垂奕禩但粵東關稅旣比他省豐饒則以通夷之銀量爲防夷之用從此製礮必求極利造船必求極堅似經費

可以酌籌卽裨益實非淺鮮矣臣於夷務辦理不善正在

奏請治罪何敢更獻芻蕘然苟有裨

國家雖頂踵捐糜亦不敢自惜倘蒙格外

天恩寬其一線或令戴罪前赴浙省隨營効力以贖前愆臣必當殫竭血誠以圖克復自粵省各處口隘防堵加嚴察看現在情形逆夷似無可乘之隙藉堪仰慰

宸懷謹繕片密陳伏祈

聖鑒謹

奏

天恩寬其...  
 附家...  
 表...  
 不善...  
 可以...

